

丙子科四川鄉試錄

嘉慶二十一年

四川鄉試錄序

嘉慶二十有一年丙子鄉試屆期

禮部臣以

四川考官請得

旨以

臣宮煥偕臣孔傳綸

往典厥事伏念

臣准

南下士幸列詞垣通籍以來涓埃未効茲

蒙

特簡昇以衡文重任聞

命震惶感悚倍至謹與

臣孔傳綸

遵限首塗星

馳抵境如期入闈於時監臨則四川總督



臣常明協同點名則四川布政使臣李鑾

宣四川按察使臣曹六興提調則四川通

省鹽茶道臣奇成額監試則護理四川分

巡松茂兵備道事龍安府知府臣程家祥

內監試則四川潼川府知府臣黃任萬肅

清綱紀罔弗恪恭爰進學政臣毛謨所錄

士扃闈三試之臣宮煥借臣孔傳綸率同

考官署成都府雙流縣知縣臣賀懋椿署

重慶府綦江縣知縣臣沈鴻達署重慶府

榮昌縣知縣臣李傳杰保寧府通江縣知

縣臣洪運開順慶府岳池縣知縣臣陶運

龢署順慶府西充縣知縣臣昔光祖敘州

府屏山縣知縣臣張澍署嘉定府夾江縣

知縣臣弓翊清綏定府東鄉縣知縣臣徐

陳謨綿州直隸州羅江縣知縣臣李桂林

等齋心協誠虛衷校閱得士如額循例錄

文恭

呈

御覽謹拜手稽首颺言簡端 臣惟文章之本期  
於通經致用而推其效足以化民而成俗  
於文觀其蓄畬經訓於策觀其貫穿古今  
於詩觀其志和而音雅數者皆合而後取  
焉

國家以收得人之效士以徵稽古之榮篤其  
實而藝者書之由此其選也恭惟我

皇上敦崇實學風示天下士之搯觚染翰者莫  
不蜚英騰茂發藻儒林行之乎仁義之途

游之乎詩書之源明體達用炳焉與三代  
同風矣又况蜀地風土清嘉民物秀美自  
文翁創建學宮文教之洽比於齊魯嗣是  
英儒輩出背趾相望氣節若范鎮田錫理  
學若張栻魏了翁風教所被歷久彌彰其  
蓄道德而能文章者則尤以眉山三蘇爲  
稱首信乎山川清淑之氣蜿蜒扶輿磅礴  
而鬱積其發於文者皆足以黼黻經猷潤  
色鴻業我

朝際

重熙而沐

至教百有七十餘年靈秀之所孕毓淵源之所  
 迤演尤日新月異而未有艾意必有瑰奇  
 之士務根柢而求實用者以出其間而今  
 幸得親見之也謹與臣孔傳綸竭二十餘  
 晝夜之力採金擇玉凡其文之樹骨訓典  
 矩矱先民者登之空疎餽飭者汰之兢兢  
 然慎之又慎雖未敢云拔十得五冀於

國家明經取士之法萬一有當仰副

皇上觀文成化之至意是則臣悽悽之忱與多

士相期於靡已者矣維時官斯土者兵部

尙書兼都察院右都御史總督四川等處

地方軍務兼理糧餉管巡撫事兼署成都

將軍印務志勇巴圖魯臣常明鎮守成都

等處將軍統轄松建文武提調漢土官兵

斐凌額巴圖魯二等男臣賽沖阿提督四

川全省學政內閣學士兼禮部侍郎臣毛

謨鎮守成都副都統世襲世管佐領加四級紀錄十四次臣額勒金泰提督四川全

省軍門節制各鎮苗夷提調漢土官兵託謨爾渾巴圖魯臣多隆武四川布政使臣

李鑾宣四川按察使臣曹六興鎮守松潘鎮總兵官臣盧廷璋鎮守建昌總兵官臣

張志林鎮守川北總兵官臣桂涵鎮守重慶總兵官臣羅思舉通省鹽茶道分巡成

綿地方臣奇成額分巡松茂兵備道臣李樞煥分巡建昌兵備道臣葉文馥分巡州

北兵備道臣黎學錦分巡川東兵備道臣嚴士鉉分巡川南永寧道臣胡聯璋例得

備書

翰林院編修臣宮煥謹序

嘉慶貳拾壹年丙子科四川鄉試題名錄

監臨官

嘉慶二十一年丙子科四川鄉試題名錄

常明

滿洲鑲紅旗人  
貢生

點名官

四川等處承宣布政使司布政使

李鑾宣

山西靜樂縣人  
庚戌進士

四川等處提刑按察使司按察使

曹六興

江西新建縣人  
監生

提調官

四川通省鹽茶分巡成綿道

奇成額

滿洲鑲藍旗人  
監生

監試官

護理四川分巡松茂兵備道事龍安府知府 程家祥 安徽蕪湖縣人 乙丑進士

內監試官

潼川府知府 黃任萬 河南商城縣人 辛酉進士

考試官

翰林院編修 宮煥 安徽懷遠縣人 戊辰進士

翰林院編修 孔傳綸 浙江錢塘縣人 己巳進士

同考官

署成都府雙流縣知縣 賀懋椿 湖南寧鄉縣人 己巳進士

署重慶府綦江縣知縣 沈鴻達 浙江桐鄉縣人 甲寅舉人

署重慶府榮昌縣知縣 李傳杰 江西臨川縣人 庚子舉人

保寧府通江縣知縣 洪運開 安徽合肥縣人 壬戌進士

順慶府岳池縣知縣 陶運猷 直隸天津縣人 戊辰進士

署順慶府西充縣知縣 昔光祖 甘肅寧州人 己巳進士

敘州府屏山縣知縣 張澍 甘肅武威縣人 己未進士

署嘉定府夾江縣知縣 弓翊清 河南鄭州人 己巳進士

綏定府東鄉縣知縣 徐陳謨 湖北蘄水縣人 辛酉進士

綿州直隸州羅江縣知縣 李桂林 福建閩縣人 戊辰進士

大門點名官



署成都府事寧遠府知府 余永寧

署成都府水利同知事候補同知 徐鼎

浙江山陰縣人  
議敘  
浙江會稽縣人  
議敘

貢院坊點各官

成都府成都縣知縣 王衍慶

山東聊城縣人  
壬子舉人

成都府華陽縣知縣 董淳

山東鄒縣人  
癸卯舉人

外巡查官

試用州判 江潤輝

安徽潁上縣人  
辛酉拔貢

候補鹽大使 沈煒光

江蘇元和縣人  
監生

印卷官

布政使司經歷 王樓蔭

直隸天津縣人  
附貢

內掌卷官

署潼川府樂至縣知縣 李徽典

山西太平縣人  
辛酉拔貢

外掌卷官

簡州州判 潘廷鳳

陝西咸陽縣人  
丁酉優貢

候補知縣 楊佩芝

貴州畢節縣人  
辛酉拔貢

受卷官

保寧府閬中縣知縣 李廷勳

貴州思南府人  
壬子舉人

順慶府隣水縣知縣 吳秀良

安徽全椒縣人  
乙卯舉人

署夔州府雲陽縣事候補知縣

錢枚

浙江嘉善縣人  
戊午舉人

彌封官

忠州直隸州酆都縣知縣

方宗敬

湖南巴陵縣人  
戊午舉人

忠州直隸州梁山縣知縣

周履謙

廣西陵川縣人  
庚子舉人

膳錄官

署成都府金堂縣事候補知縣

余用序

江西南昌縣人  
辛酉拔貢

署潼川府三臺縣事候補知縣

黨觀文

陝西榆林縣人  
己酉舉人

對讀官

成都府崇寧縣知縣

李自超

直隸豐潤縣人  
癸卯舉人

嘉定府洪雅縣知縣

王好音

安徽太湖縣人  
己酉副榜

大門巡捕官

茂州直隸州汶川縣典史

沈濤

安徽涇縣人  
監生

二門巡捕官

直隸敘永廳永寧縣縣丞

王仲勳

直隸大興縣人  
監生

潼川府射洪縣巡檢

楊世鯁

浙江錢塘縣人  
監生

至公堂巡捕官

敘州府富順縣鄧井關縣丞

方璋

安徽桐城縣人  
議敘

清白堂巡捕官

重慶府巴縣典史 徐柱

江蘇陽湖縣人  
議敘

嚴肅堂巡捕官

潼川府蓬溪縣蓬萊鎮縣丞 孫培遠

雲南呈貢縣人  
附監生

東文場巡綽官

成都府雙流縣典史 陳自得

順天宛平縣人  
監生

成都府彭縣典史 曹琳

順天宛平縣人  
議敘

敘州府雷波廳照磨 陳朝鼎

浙江山陰縣人  
議敘

西文場巡綽官

潼川府中江縣典史 王溥

順天大興縣人  
議敘

綏定府大竹縣典史 涂五雲

福建長汀縣人  
議敘

松潘廳南坪理番巡檢 田文烜

河南固始縣人  
監生

東新文場巡綽官

候補從九品 吳立勳

江蘇江陰縣人  
議敘

西新文場巡綽官

嘉定府洪雅縣典史 馬長清

順天大興縣人  
議敘

綿州直隸州羅江縣典史 劉南暉

浙江鄞縣人  
職員

明遠樓巡綽官

潼川府樂至縣典史 周正道

湖北江夏縣人  
議敘

東哨樓巡緝官

邛州直隸州吏目 王川至

廣東興寧縣人 監生

重慶府巴縣巡檢 王永沛

甘肅武威縣人 吏員

西哨樓巡緝官

順慶府蓬州吏目 盧樹葵

順天大興縣人 吏員

保寧府巴州江口鎮巡檢 胡榮宇

貴州貴筑縣人 吏員

供給官

綿州直隸州州判 王州

鑲紅旗漢軍人 已酉拔貢

邛州直隸州州判 吳翀霄

浙江石門縣人 丙午副榜

候補知縣 劉煊

順天大興縣人 議敘

綏定府達縣巡檢 張覲

浙江烏程縣人 監生

候補從九品 徐世洪

浙江山陰縣人 監生

候補從九品 李志昉

江蘇甘泉縣人 議敘

貢院坊外巡官

成都城守左營千總 林永清

四川成都縣人 行伍

內巡官

成都城守右營千總 王萬春

四川成都縣人 武生

大門按檢官

督標中營千總 王正邦

四川雙流縣人  
行伍

督標中營効力武舉 高聯陞

四川成都縣人  
甲子舉人

二門按檢官

成都城守右營把總 余占魁

四川雙流縣人  
武生

成都城守右營把總 孫占魁

四川新津縣人  
行伍

貢院坊按檢官

成都城守左營千總 李遇春

四川華陽縣人  
行伍

成都城守右營千總 楊正華

四川成都縣人  
行伍

第壹場

四書

政事冉有季路文學子游子夏

時使薄斂所以勸百姓也

晉人以垂棘之璧與屈產之乘假道於虞

以伐虢宮之奇諫

詩

賦得八月其穫 得秋字五言八韻

第貳場

易經

君子以辯上下定民志

書經

文王卑服即康功田功

詩經

蒹葭蒼蒼白露為霜所謂伊人在水一方

春秋

晉欒書帥師救鄭 成公六年

禮記

宵雅肄三

第叁場

策五道

問十翼為易之傳所言天地風雷水火山

澤皆本卦象至頤中有物有飛鳥之象

又奚本歟荀爽虞翻等於十翼內無語

不求其象能約舉歟尚書古有堯典無

舜典有夏書無虞書孟子及左氏傳所

引至詳矣外此尚有引之者歟或有稱

爲虞夏書者能確指其人歟詩二南皆  
西周詩而何彼穠矣一章所稱平王齊  
侯者又何以稱歟後儒有指此章爲刺  
詩者其說奚若於義當歟春秋五伯有  
二有三代之五伯杜元凱左氏傳註與  
風俗通同有春秋之五伯顏師古漢書  
註與白虎通異而荀子則列句踐於五  
伯內能悉數歟禮記土鼓陶匏屬八音  
後世大樂無匏土何歟抑八音皆具五  
行之氣惟水火不可用古人作樂有寓  
火於金寓水於石者能援經以證歟

聖朝經術昌明義禮大備多士稽古有年盍各  
抒所聞以對

問史以鑑名自荀悅申鑒外涑水之通鑑  
爲最著起戰國終五代誠編年之總會  
顧當時自選官屬分任者究繫何人借  
書秘閣採輯者究繫何書閱年若干爲  
卷若干公自謂一生精力實盡於此宜

其顯微闡幽悉關大義而縱橫之說存而不刪怪異之事纖而必錄者又何說歟范祖禹綜有唐一代之事撮其大綱而著爲鑑其論斷精嚴學識正大處能一再數歟篇目何似註者何人刊於何日毀於何時朱子始終何議其分晰之劉恕撰通鑑外紀袁樞撰通鑑紀事本末李燾撰續通鑑長編是非得失其視華陽之唐鑑爲何若石介亦有唐鑑五

卷果足與華陽竝存歟洪惟

聖學高深

御製讀通鑑紀事本末詩於歌詠之中寓筆削之義近又

特命儒臣倣祖禹之書纂輯明鑑諸生具有史材者其各抒所得以著於篇

問聖有謨訓自古爲昭連山歸藏乾坤皆古皇手定顧其書至元豐中始出果可信歟黃帝之書流傳最廣列子所引見



於何篇漢藝文志所載如四經六銘外  
更有何書漢志稱高祖傳十三篇孝文  
傳十一篇所記何語東漢顯宗最爲博  
雅自制光武紀外更著何書魏三祖集  
見於晉志者各若干本晉明帝及宋武  
帝文帝集見於唐志者各若干本梁武  
帝著撰甚富能臚舉歟唐太宗文集及  
開元御集存佚若何宋太宗御集三十  
本外更有何書真宗集誰爲箋註仁宗  
神宗集誰爲編次至於箴之義取乎警  
夏商之存者何許唐則君臣箴政刑箴  
宋則修身箴明則有官箴三十五篇能  
詳考其篇什年代歟我

皇上文思淵裕

御製文集炳若日星近復

親撰官箴

頒賜內外臣工斯誠千載一時之遇也

問書載欽哉欽哉惟刑之恤哉恤史記作

靜徐廣曰今文爲謚爾雅曰謚靜也用  
刑者欲靜而無擾乃有以憂訓恤其說  
孰當易於噬嗑言獄其卦內震外離於  
獄無象厥義何取孝經緯云三皇無文  
五帝畫象三王肉刑豈上世淳樸果能  
廢刑歟抑後人依託之詞歟律令著爲  
書始自何人漢蕭何定爲九篇叔孫通  
增爲十八篇果盡善歟隋文帝敕蘇威  
更定新律議者謂其法簡要可約舉歟  
唐刑書有四曰律令格式其義若何宋  
仍唐制所改者何條元刑書三易何得  
何失明初卽頒律令後又造律文作大  
誥用意未嘗不慎而其後反失之酷者  
何也方今

聖澤涵濡無遠弗屆伏讀

御製慎刑論至詳至悉無隱不孚邇者

申命內外臣工除莠安良無致株累仰見

聖天子好生之德洽於民心士子有得於古必

有裨於今尙其考据舊章條析言之  
問重農爲治之本小正幽風所載多切田  
功後世師其意者何書管子呂覽所陳  
種植法文句典奧有所本歟劉向七畧  
綜別九流以農家自爲一類其書尙存  
歟後魏賈思勰著齊民要術十卷其自  
序云起自耕農終於醯醢資生之業靡  
不畢書然歟唐中和節所進農書世無  
傳本而唐志所載農家雜以相馬相鶴

諸經及茶經竹譜之屬是亦有關於農  
者歟宋人所傳僅陳旉農書三卷得失  
若何元時頒行農桑輯要七卷繫何人  
所進曾明善撰農桑衣食撮要二卷欲  
以補農桑輯要所未備所補者何條王  
伯善農書二十二卷在元書中最爲典  
瞻明徐光啟農政全書六十卷亦稱完  
備能類舉歟我

國家勸農敦俗邁越前古蜀西爲膏腴之壤

生斯土者固宜悉心講畫以益臻豫大  
豐亨之美焉

# 中式舉人六十二名俱習五經

第一 名李芬 年叁拾陸歲 廣安州 學生

第二 名安殿元 年叁拾捌歲 雙流縣 學生

第三 名姒朝綰 年貳拾陸歲 樂山縣 附生

第四 名楊青遠 年貳拾伍歲 郫縣 附生

第五 名李特壽 年貳拾柒歲 中江縣 學生

第六 名陳光黼 年貳拾壹歲 重慶府 附生

第七 名王廷瑄 年叁拾歲 江津縣 學生

第八名楊鳳翽 年拾陸歲 大竹縣 綏定 附生

第九名梁炳 年參拾貳歲 達縣 綏定 訓導

第十名羅珍 年貳拾捌歲 威遠縣 嘉定 增生

第十一名龍在田 年參拾肆歲 敘州府 拔貢

第十二名曹兆亨 年貳拾柒歲 榮縣 嘉定 學生

第十三名敬德科 年貳拾歲 三臺縣 潼川 附生

第十四名馬騰蛟 年肆拾壹歲 仁壽縣 資 試用訓導

第十五名胡璠 年貳拾參歲 邛州 學生

第十六名黃裳 年貳拾陸歲 新都縣 成都 學生

第十七名鍾殿華 年肆拾壹歲 蒲江縣 印 學生

第十八名李維楨 年貳拾捌歲 成都府 學生

第十九名伍訥 年肆拾肆歲 崇寧縣 成都 附生

第二十名石硯田 年貳拾陸歲 重慶府 附生

第二十一名熊鍾璜 年參拾捌歲 瀘州 學生

第二十二名李鋈 年參拾壹歲 嘉定府 附生

第二十三名李樹壇 年貳拾玖歲 華陽縣 成都 附生

第二十四名何軒 年參拾歲 涪州 重慶 學生

第二十五名夏健 年參拾柒歲 仁壽縣 資 附生

乙卯中書

己卯

壬午

癸未

第二十六名戴雲衢 年參拾歲 金堂縣 成都 增生

第二十七名楊繼忠 年參拾肆歲 瀘州 附生

第二十八名鄧中煦 年參拾叁歲 墊江縣 忠 學生

第二十九名陳映新 年貳拾陸歲 邛州 增生

第三十名關啟雲 年貳拾叁歲 閬中縣 保寧 增生

第三十一名楊蔚起 年貳拾陸歲 渠縣 綏定 附生

第三十二名蔣宗弼 年參拾貳歲 納谿縣 瀘 附生

第三十三名張文燦 年參拾肆歲 大邑縣 邛 學生

第三十四名廖掄元 年參拾陸歲 簡州 成都 試用訓導

第三十五名吳容 年參拾柒歲 榮縣 嘉定 學生

第三十六名張耀祖 年貳拾壹歲 蒼溪縣 保寧 學生

第三十七名洪嘉春 年參拾貳歲 成都縣 成都 附生

第三十八名黃淑瓏 年貳拾陸歲 瀘州 增生

第三十九名王乃宣 年貳拾肆歲 廣安州 順慶 增生

第四十名申瓏 年貳拾肆歲 納谿縣 瀘 增生

第四十一名黃履中 年肆拾歲 璧山縣 重慶 學生

第四十二名陳在田 年參拾壹歲 大竹縣 綏定 增生

第四十三名鄒錦 年肆拾柒歲 嘉定府 學生

第四十四名熊稜 年叁拾叁歲 重慶府 學生

第四十五名杜鳳儀 年貳拾捌歲 閬中縣 保寧 學生

第四十六名黃中和 年貳拾捌歲 內江縣 資 附生

第四十七名胡漸遠 年叁拾肆歲 銅梁縣 重慶 附生

第四十八名羅天衡 年叁拾玖歲 合州 重慶 副榜

第四十九名曾國光 年貳拾陸歲 簡州 成都 增生

第五十名洪嘉孚 年貳拾玖歲 華陽縣 成都 副榜

第五十一名王與綬 年叁拾貳歲 西昌縣 寧遠 學生

第五十二名黎濬 年叁拾陸歲 涪州 重慶 學生

癸未

第五十三名毛含昱 年貳拾伍歲 溫江縣 成都 附生

第五十四名劉鳳鳴 年貳拾肆歲 新繁縣 成都 附生

第五十五名宋煊 年貳拾肆歲 灌縣 成都 學生

第五十六名陳國器 年貳拾歲 資陽縣 資 附生

第五十七名程如南 年叁拾捌歲 墊江縣 忠 學生

第五十八名熊文懋 年貳拾壹歲 長寧縣 敘州 附生

第五十九名熊文鳳 年貳拾肆歲 順慶府 學生

第六十名顏文矩 年叁拾歲 敘州府 學生

第六十一名強謙 年貳拾玖歲 正黃旗 滿洲 旗生

丙戌

第壹場

四書

政事冉有季路文學子游子夏

李芬

綿州直隸州羅江縣知縣 李桂林 閱 薦

翰 林 院 編 修 孔傳綸 批 大氣包舉

翰 林 院 編 修 宮煥 批 理實氣空

行道與傳道竝著愈見聖門之多才也夫政事行道之資而文學傳道之器也從陳蔡者復得



冉有諸賢豈偶然哉嘗觀世之盛也道在君相故治世與傳世者皆得濟美焉而各盡其才及其衰也道在師儒而服官與服古者乃使履困焉而交致之厄陳蔡一役豈特德行言語之足繫聖心哉蓋又有政事文學者焉古今幹濟之材遺於上必萃於下育才者蓋欲預爲儲焉以俟撥亂反正之日而顯其用宇宙菁華之氣聚於聖亦散於賢降才者又各分爲寄焉以爲離經畔道之世而正其傳乃吾竊爲由求感矣謂

文字爲鬼神所忌精其業者每遇坎坷似也何以材任富強非必無補生人之業而亦令其坐困如斯也天心尙可問乎且夫道大莫容天卽欲阻吾子以大用天何妨任吾黨以小試乃求可理財而莫解七日之阨由能治賦而竟受二國之圍在造物竟若特因其長以相迫是何數之太奇也然而禦齊者已偏師制勝矣治蒲者已三善稱能矣且更爲游夏悲也謂功名爲氣數所開非其時則動有奇禍似也何以躬侍贊

修亦不得邀彼蒼之眷而竟聽其偃蹇如是也  
天意其誰測乎且夫斯文在茲天既縱吾子以  
將聖天何難縱吾徒以學聖乃子游習禮而俎  
豆難以化干戈子夏習詩而粒誦不能靖戎馬  
在造物竟若曲乘其短以相嘗何所遭之不偶  
也然而南人好文子游已名足千古矣北人好  
學子夏已才冠一世矣之四子者其在於上長  
於政者用以濟世優於學者用以覺世所職豈  
不偉哉是可舉爲將爲相爲師爲友而身焉任  
之卽在於下政不行而道可以藏學不顯而道  
可以載相對亦足慰耳乃僅得于魯于衛于吳  
于魏而心焉憶之其如夫子何哉  
時使薄斂所以勸百姓也

李芬

綿州直隸州羅江縣知縣 李桂林 閱薦

翰林院編修 孔傳綸 批情文相生

翰林院編修 宮煥 批精切不浮

卽使與斂而民胥勸在善留其有餘而已夫時

使則不竭其力薄斂則不盡其財善留其有餘而勸百姓之事已盡告哀公曰人主撫有一國未有不欲合一國之力與財而皆爲我用者也而往往難之何也其始以爲民有力而吾用之後遂直竭其力而不恤其初以爲民有財而吾取之後遂立匱其財而不知豈知民卽有力與財必不能以財力旣盡之身急公上而媚我君王則勸之道宜亟講也夫用民力而不竭其力則莫若時使大兵大役朝廷不得已而後動當

此而曰使役唯命毋妨國事猶偶然耳所慮者一朝會之常而鼙鼓日疲於奔命民力幾何其何以繼且卽使能繼而登高瞻望岷岵徒嗟此父母所不忍聞諸子者而上之人顧迫而使之而漠不加戚揆諸息事寧人之意毋乃傷我父老心惟酌之以時而上地下地多寡旣均其勞有年無年疎數必垂爲令卽一司空之徵召而常若有髮膚我傷手足我勞支體我虧之懼則其仁心有入人肺腑者矣周之盛也周南不載

民勞之詩所以體穆考如傷之念洛誥太書庶  
殷之作所以著寧王用衆之忱說以使民民忘  
其勞復何至於築城而謳起于思戍申而興懷  
揚水也哉且取民而不匱其財則莫若薄斂大  
札大荒國家數十年而一遇於此而始薄賦緩  
征藉紓民命祇權謀耳所患者一酒漿之細而  
泉府必精其會計民財幾何其何以供且即使  
能供而暮夜追呼膏脂立竭此父母所不忍見  
諸子者而上之人顧厚而斂之而恬不爲怪衷

諸嘉惠黎元之道其將如此婦子何惟準之以  
薄而好用匪頒在宮廷旣無濫費山澤關市於  
草野何有妄征祇此司稼之頒灋而俱若有勞  
農自我息老自我嫁子娶妻自我之心則其厚  
澤有浹人肌膚者矣周禮一書九職居九賦之  
先所以明財賦之有所由出九式列九賦之後  
所以見輸將之不容過多損上益下民說無疆  
而何有於賦萑楚者歎猗儺歌碩鼠者懷樂土  
也哉百姓之勸勸以此也公其加之意乎

晉人以垂棘之璧與屈產之乘假道於虞  
以伐虢宮之奇諫

李芬

綿州直隸州羅江縣知縣 李桂林 閱薦

翰林院編修 孔傳綸 批 崇論閎議

翰林院編修 宮煥 批 思清筆健

晉有謀臣虞固未嘗無諫臣也夫晉人之料虞  
亦能料宮之奇耳亦能料宮之奇之必出於諫  
耳不然假道之璧馬胡爲乎來哉嘗思戰國多

策士而春秋重謀臣策士之術不能持遠故國  
有人焉則奇謀譎計有所不敢施謀臣之計必  
先料敵故必有間焉則美幣甘言以期其必入  
君子觀於狡焉思啟之日未嘗不歎一時良臣  
竟有墮諸術中而不覺者然而如是者蓋亦僅  
矣知此可與論百里奚在虞時事夫使奚爲虞  
人而強隣無鯨吞蠶食之謀宗國無唇亡齒寒  
之慮俾得與一二老成從容坐論進退宴如斯  
亦士君子棲遲人國不幸中之一幸也而奚顧

不能則以其有晉人也則以晉人之以垂棘之璧與屈產之乘假道於虞以伐虢也且夫晉之有荀息也猶虞之有宮之奇也乃當日假道之謀祇津津於內府外府中廡外廡之說彼荀息者毋乃視虞太輕而料宮之奇太易也而不知晉不惟能料宮之奇且能料宮之奇之必出於諫也料其必諫而假道之計遂決亦惟假道之計既決而宮之奇乃必出於諫以彼推輔車相依之勢而寇不可啟遂不憚以慷慨直言特啟

吾君之聰聽在虞君亦何幸聞此風議也然而此舉甚寥寥矣夫人臣之入諫也當必思有以善其後而宮之奇則遠悲及於晉宗近憂切於虞祀直欲以一時論辨延下陽數年未滅之命此一諫也當又被伐之號君所聆而色阻者矣想其念少長於君之義而責無可辭遂不惜以伏闕陳書獨矢孤臣之忠愛在虞臣亦何可少此骨鯁也然而此風殊落落矣夫晉卿之諫君也曾有人以爲之先而宮之奇則署牘不待同

官矢口不嫌獨斷直欲以一人痛泣沮晉車七  
百東向之心此一諫也當亦謀國之晉人所聞  
而膽落者矣雖然諫則諫矣其如君之不悟何  
若百里奚則豈晉人之所能料哉

詩

賦得八月其穫

得秋字五言八韻

李芬

綿州直隸州羅江縣知縣

李桂林 閱 薦

翰

林

院

編修

孔傳綸

批

志和音雅

翰

林

院

編修

宮

煥

批

吐屬風雅

天上開金粟農家慶有秋兆先魚夢卜種  
待雁來收笠壓雲千朶鑷彎月半鈎頻聞  
聲恻恻都失影油油鴉嘴今年耜龍鱗舊  
日疇占豐連亥市報稔逸庚郵拾穗兒童  
喜吹函主伯謳嘉禾徵

聖世瑞獻古梁州

第貳場

易經

君子以辯上下定民志

李芬

綿州直隸州羅江縣知縣 李桂林 閱薦

翰林院編修 孔傳綸 批 陶鎔經義

翰林院編修 宮煥 批 理境精深

履象通於上下辯之而民志可定矣夫民志不一由於上下之分不明耳辯以定之君子所爲觀履而得其象乎嘗思安上治民莫善於禮禮也者履也履而泰然後安此一時貴賤之所由

定位而卽千古明分之所以常昭也則試卽上天下澤以觀其象夫乾健也位乎陽而爲君有大人在上之象焉君子將以立正位凝命之基而烏得不辯兌說也主於應而居陰有下民從風之象焉君子將以樹章志貞教之坊而烏得不辯且其初變則爲訟訟不可以終凶再變則爲无妄无妄所以寡過皆下之象也至三變而復爲乾則自下上上之義以彰四變而爲中孚中孚主於惠德五變而爲鼎鼎主於取新皆上



之象也至上變而復爲兌而自上下下之形以著由是辯之於上則義取於伸陽陽之數極於九故冕服則用九章璪采則用九旒祀事則用九獻以及命曰九命服曰九服門曰九門貢曰九貢無不符乎陽之用九焉而禮行於在上矣辯之於下則義取乎抑陰陰之數位於六故列侯只用六羽次國惟膺六命正位不過六儀以及行曰六行德曰六德典曰六典官曰六官靡不法乎陰之用六焉而禮達於在下矣夫如是以辯之則上有常尊下無踰分而少凌長小加大賤妨貴其情可以不賤而自銷且如是以辯之則上也不驕下也不倍而曰君臣曰父子曰夫婦其位自釐然而各正民志之定定於此矣不可見履之爲義誠大矣哉

書經

文王卑服卽康功田功

李芬

綿州直隸州羅江縣知縣

李桂林 閱 薦

翰 林 院 編 修 孔傳綸 批 發揮朗暢

翰 林 院 編 修 宮煥 批 佩實銜華

儉於已以勤民又以立興周之業也夫使自御  
不儉毋乃妨我民功乎觀文王之卑服而康田  
之功已舉不又以立興周之業哉周公若曰從  
來後王嗣位亦惟是紹衣前人之德而罔敢荒  
墜厥功已耳我周之先鞅琫陟降備美公劉論  
者謂其以如是之容服親如是之勞苦爲後人  
所繼序不忘焉而不知太王王季而後有服不

必如舟瑤之美而勞可以媿巘原之勤者則又  
有文王象箸玉杯我不敢效瑤臺璇室我不敢  
爲夫亦謂妨厥庸功耳乃何以黻冕錫自王朝  
幸得同上公之服而取彼在筓竟樂效夏王之  
惡也迨至葛覃絺綌澣濯猶傳於后妃則文王  
之不敢以藻衣繪裳忘物力之艱難可知也已  
我溯邠封苧蒲其服我懷邠館狐狸爲裘夫亦  
謂膚功未奏耳乃何以王業剏於岐山幸得邀  
朱紱之來而服之無斲竟不絢虞廷之章也迨

至羔羊素絲節儉猶風於有位而文王之不敢以筐篚纁元竭閭閻之杼柚更可知也已今夫纂組弗御可以見衣被六合之心而安養時勤卽以駘覆庇萬民之業然則文王之卑服也豈惟是自昭儉德哉蓋以卽康功田功云際王室之如燬而山少儀鳳澤多勞魚於此求安安亦不易然而高山天作非文王其誰康之也以臣觀當日伐密伐崇除其暴作程作豐奠厥居萬不欲使草野蚩氓或受阡危之苦此何如鴻功

也故自求寧有穆考而遂以樹本俗六保息六之先聲承祖宗之世業而田猶待墾邑猶待遷於此言養養亦甚難然而岐豐原隰非文王其誰田之也以臣攷在昔九一爲之定其征大匡爲之甦其困萬不欲使穢穢窮民或膺饑寒之慘斯何如偉烈也故自駿惠頌文王而遂以立均地守辨物生之定矩此文王之所其無逸也

詩經

蒹葭蒼蒼白露爲霜所謂伊人在水一方

李芬

綿州直隸州羅江縣知縣 李桂林 閱 薦

翰林院編修 孔傳綸 批 紆餘為妍

翰林院編修 宮煥 批 文情茂美

因時物以懷人情已移於一方矣夫葭蒼露白  
正懷人候也彼伊人者謂能忘其在水一方哉  
詩人以爲吾嘗見夫咏榛苓者念美人歌零露  
者思君子未嘗不歎覩物抒懷有不僅指目其  
棲遲者矣然景以觸而移情在我旣深其遐想

則地以幽而可卽在彼或卜厥芳隣正不得謂  
入水必深而遽作天各一方想也今日者脈脈  
余懷永叩須乎我友盈盈一水徒空結夫遙情  
迴憶春草碧色春水綠波欣晤對於彼美贈話  
言於江干此境已渺不可得矣而第見夫山帶  
秋容蘆花兩岸露橫江芷水天一色猶是蒹葭  
也而已蒼蒼者其色矣眇彼白露也而湛湛者  
且爲霜矣旣目遇而成色卽引人以入勝未免  
有情誰能遣此而幸也有伊人在今夫伊人亦

豈易定其所在哉使伊人而躬逢茁葭之盛吾知其春田使伊人而載賡湛露之歌吾知其不深者非耶即不然而或在山巔倘所謂入林惟恐不密者又非耶而今之所謂伊人究安在耶間嘗歷雍岐涉汧渭見夫清風徐來水光接天草色芊綿掩映波間之色露華璀璨點綴幽人之居以為一葉可駕則駕之半堵可安則安之宜乎知者樂水居必有方此其中將大有人在也乃竚立已久延望彌長而在一方者又且無方矣此吾所以縱一葦之所如凌萬頃之茫然而不憚於上下求之也

春秋

晉樂書帥師救鄭

成公六年

李芬

綿州直隸州羅江縣知縣

李桂林 閱 薦

翰 林

院

編 修

孔傳綸 批

斷制精確

翰 林

院

編 修

宮 煥 批

有書有筆

書晉卿救鄭之師見鄭非楚所得爭也夫鄭不附楚恃有晉耳樂書救之則鄭安而東方諸侯以安豈細故哉故春秋特書以予之嘗思春秋大勢在鄭故楚欲東合諸侯必以爭鄭爲先爭之而不得其道適以重其猾夏之罪而晉欲南攘荆楚亦必以保鄭爲急保之而能與爲安乃以見其恤侯之勤若是者厥惟晉樂書帥師救鄭一役顧說者謂是役也見書之能用衆也夫國有大事君行師從故君將不稱師其餘將卑

師衆稱師將卑師少稱人而將尊師衆則言帥師當是時楚爲勅敵自非七百之乘莫禦兩廣之雄况書爲鄭卿軍師從之者衆倘非有以節制之安在繞角一遇不又將六人同罪哉乃侵蔡之謀獨從三善諸軍晏如兵不血刃而強隣屈師不遷怒而小國安是一役也晉可以霸而或者又曰春秋重伐國故凡救必書其自莊六年書王人救衛以及救邢救許救宋救齊皆大書特書不一書要以著其恤隣之心救災之義

耳於樂書乎何異夫由前之說可以見行師之道由後之說可以申字小之方而要未足以盡樂書救鄭之義今夫春秋主於攘楚慨自僖十一年楚人伐黃而齊不救中外之防遂潰君子觀於漢陽諸姬楚實盡之未嘗不歎息痛恨於齊桓也當書之時楚氛甚熾矣逞嬰齊之意固欲得鄭而甘心焉使楚伐而晉不救則鄭必南折而入於楚鄭入楚則東方之藩已撤吾恐楚逞其蠶食之謀而晉且將奔命不遑矣豈天下之細故哉乃自樂書一救而楚人問鼎之謀以戢而異日三駕之功以基吾故曰書樂書救鄭見鄭非楚所得爭也

禮記

宵雅肄三

李芬

綿州直隸州羅江縣知縣

李桂林 閱薦

翰林院

編修

孔傳綸 批詞無枝葉

翰林院

編修

宮煥 批筆有餘妍

肄詩於祭菜之後義莫備於宵雅焉夫宵雅三章似非學者所有事也乃大學教人卽於祭菜後肄之豈無意哉嘗考詩教創自虞廷而後世立學者亦必春夏教以詩書是蓋統乎全詩以爲訓者也顧讀詩必全詩先王所以旁求通經之士而讀詩不必全詩大學所以別有教人之方則曷於祭菜後而觀其所肄乎寬靜柔正者宜歌頌溫良慈惠者宜歌風廣大疎達者宜歌大雅學詩者亦似性各有近然此歌也而非肄

也蓋歌可存乎其人而肄則因乎其時也升歌肆夏則合大雅間歌三終則及魚麗合樂三終則竝及葛覃用詩者咸知義可兼及然此合於樂而非肄於學也夫用之樂貴於博而存以肄惟其宜也若是者其惟宵雅乎今夫小雅之材七十四人作者備讀者亦宜求詳彼其間如湛露之荷龍光彤弓之覺報晏以及天保治內采薇治外諸詩罔非一時君臣贈答頌美之詞學者而不學詩學者而欲學詩亦何在不可肄業



及之者不知言天下之事形四方之風莫如小  
雅所載而君將其厚意臣竭其股肱則惟鹿鳴  
之三嘗觀古昔盛時有享以訓恭儉即有燕以  
示慈惠故鹿鳴一詩具見聖天子歡欣和樂以  
接臣下之忱焉至若四牡勞使也而必聯之以  
情皇華遣使也而必諷之以義則一時誼美恩  
明之象又不然昭矣讀是詩者其將有感於斯  
乎而大學始教其意顧不在此

第叁場

策五道

第一問

李芬

綿州直隸州羅江縣知縣 李桂林 閱 薦

翰 林 院 編 修 孔傳綸 批 考据條賜

翰 林 院 編 修 宮 煥 批 典瞻詳明

周易自伏羲畫卦文王作彖辭周公作爻  
辭謂之經孔子作傳彖象繫辭傳上下各  
二篇文言說卦序卦雜卦傳各一篇所謂

十翼也至所言天地雷風水火山澤皆卦之本象惟頤中有物本之卦名有飛鳥之象本之卦辭而孔子未嘗增設一象也荀爽虞翻等以爲象外生象如同聲相應爲震巽同氣相求爲艮兌水流濕火就燥爲坎離雲從龍則曰乾爲龍風從虎則曰坤爲虎之類於十翼內無語不求其象殆難更僕數矣古時有堯典無舜典有夏書無虞書如孟子引二十有八載一節而謂之

堯典則序之別爲舜典者非矣左氏傳莊公八年引臯陶邁種德僖公二十四年引地平天成二十七年引賦納以言文公七年引戒之用休襄公五年引成允成功二十一年二十三年兩引念茲在茲二十六  
年引與其殺不辜哀公六年引允出茲在茲十八年引官占惟先蔽志皆謂之夏書則後之目爲虞書者贅矣外此國語周內史過引衆非元后二句亦謂之夏書而馬

融王肅等則又稱爲虞夏書焉二南爲西  
周詩而東周亦與焉據何彼穠矣一章其  
曰平王之孫齊侯之子考春秋莊公元年  
書王姬歸於齊此乃桓王女平王孫下嫁  
於齊襄公非平王孫齊侯子而何說者必  
欲以爲西周之詩於時未有平王乃以平  
爲平正之王齊爲齊一之侯與書言寧王  
同義得非妄歟至有目爲刺詩者以王姬  
徒有容色之盛而無肅雝之德故有是論

然二南詩用爲燕樂鄉樂射樂房中樂如  
鼓鐘卒章所謂以雅以南春秋傳所謂象  
箭南籥文王世子所謂胥鼓南者是安得  
有刺蓋必東周時列國多故而王姬下嫁  
以樹援于強大猶能尋盟府之墜言繼昏  
媼之夙好聖人故有取焉何後儒不察而  
爲紛紛之論哉春秋五伯有三代之五伯  
如杜氏註齊國佐言五伯之霸也勤而撫  
之則以爲夏伯昆吾商伯大彭豕韋周伯

齊桓晉文與應劭風俗通同有春秋之五  
伯顏師古註漢書同姓諸侯王表五伯則  
以爲齊桓宋襄晉文秦穆吳夫差與白虎  
通後一說謂爲齊桓晉文秦穆楚莊吳闔  
閭者異至荀子又以桓文楚莊闔閭句踐  
爲五伯蓋與董江都所對同意歟禮記土  
鼓陶匏屬八音後世易爲笙與埙皆以木  
爲之而八音但有其六矣八音具五行之  
氣惟水火不可用故寓火於金寓水於石  
鳧氏爲鐘火之至也泗濱浮磬水之精也  
用天地之情以制器是以五行備而八音  
諧也我

國家經術昌明義理大備

皇上至教覃敷表章正學士生其時所宜潛心  
往訓折衷羣言以求合於一是也

第二問

李芬

綿州直隸州羅江縣知縣 李桂林 閱薦

翰林院編修孔傳綸批識見闕通

翰林院編修宮煥批源委洞澈

古無所謂鑑也自荀悅作申鑒而始以名書唐張九齡於中和節上千秋金鑒宋孝宗賜都統戚方以孫子龜鑑蓋鑑也者所以綜前代之事蹟示後人之誥誡也而義例精嚴足以上繼麟經者則惟涑水之通鑑治平中司馬光約戰國至秦二世效左氏體爲通志八卷以進英宗悅之命續其事

就崇文殿開局許自選官屬得借秘閣書籍一時分任其事者史記前後漢則劉貢父三國歷九朝而隋則劉道原唐迨五代則范華陽其採擇之書自正史外則陸賈之楚漢春秋趙長君之吳越春秋崔鴻之十六國春秋李延壽柳芳高峻等之書共二百二十餘種上起戰國下終五代計二百九十函卷凡閱十九年而書成公自謂一生精力實盡於此誠非虛語大節如

書晉大夫某某之爲諸侯明君臣之分也  
四皓之助惠帝力辨其立黨制父明父子  
之義也小節如蘇張之事不刪見辨說之  
覆邦也姓武之織必錄見妖異之足儆也  
是固公之學識精正亦官屬得人故耳范  
華陽綜有唐一代之事明其善惡考其得  
失撮取大綱而繫以論斷如褚遂良之譖  
劉洎陸贄之陷竇參韓休之譖李林甫顏  
真卿之從賊皆爲之力辨其誣謂非識高  
千古胸有全竹者哉其論李贄皇牛僧孺  
爭維州一事雖不免稍失於正要其敷陳  
治道義例詳明不可謂非深於史法者其  
書共十二卷合注爲二十四卷神宗之世  
已先鏤板行世卒至黨人事出毀於章惇  
蔡京諸人之手固由清流所激抑時勢所  
值也朱子大全初與門人問答譏其書爲  
近於濫迨至考定綱目乃美其議論詳而  
比例嚴於書爵書名書國書諡之類一悉

仍之則謂華陽之唐鑑足與涑水之通鑑  
竝傳也可當温公作通鑑時劉恕以為何  
不起自上古因撰外紀以補其缺猶國語  
為春秋外傳也袁樞撰通鑑紀事本末部  
居門目曲有餘意朱子以為錯綜温公之  
書其亦國語之流矣李燾之續通鑑長編  
悉遵温公義例纂輯一祖八宗事跡粲然  
無遺亦足以拾遺補缺而以視范氏之唐  
鑑尚不可同日語則石徂徠之唐鑑五卷

不亦簡乎現在

特命儒臣倣祖禹之書纂輯明鑑屬在士林敢  
不盡摭所聞以求當於萬一耶

第三問

李芬

綿州直隸州羅江縣知縣 李桂林 閱薦

翰林院編修 孔傳綸 批博而能該

翰林院編修 宮煥 批有條有理

按天皇本山墳作連山人皇本地墳作歸

藏地皇本形墳作坤乾漢魏以前其書不傳至元豐中始出王伯厚以爲文古詞質非後人能爲則好古之過也四經六韜軒轅手定列子天瑞篇力命篇及呂氏春秋多引黃帝微言然上圓下矩之誨實爲箴銘而背虛繫孤之術流爲兵畧亦變本之非其質也漢藝文志載黃帝四經四篇黃帝銘六篇黃帝君臣十篇小說家黃帝說四十篇兵陰陽十六篇圖二篇五行家黃帝陰陽二十五卷醫經黃帝內經十八卷外經三十七卷蓋古之文章藝術於是乎具三代而下漢爲近古志稱高祖傳十三篇蓋高祖與大臣述古語及詔策也孝文傳十一篇蓋文帝所稱及詔策也顯宗自製五家要說章句令桓郁校定於宣明殿永平十五年復作光武紀以示東平王蒼史稱漢武帝號令文章炳焉可述以此媿美前徽亦何多讓晉志載魏武帝集三十



卷文帝集十卷明帝集十卷晉明帝集五  
卷宋武帝集二十卷文帝集十卷俱見唐  
志而梁武帝紀云撰通史六百卷周易毛  
詩春秋及中庸孝經各書說凡二百餘卷  
躬製文凡百二十卷可稱浩博矣唐太宗  
嚮學多屬文共集四十卷當時稱其筆邁  
鍾張詞窮賈馬文鋒旣振宮徵自調諒哉  
後此開元御集惜其散佚無從輯錄宋太  
宗御集三十卷外有朱邸集十卷秘藏銓

三十卷旁及琴譜棋勢俱有論著天禧眞  
宗御集百二十卷著作佐郎張仲尹上言  
請詔儒臣箋注詔從之而仁宗御集一百  
卷則呂公著等所編次神宗文集九十卷  
則蘇軾劉攽等所編次固與崇觀宸奎集  
同爲昭鑠至於箴之義取乎儆周書文傳  
解有夏箴孔晁注以爲夏禹之箴戒書也  
文心雕龍稱夏商二箴餘句尙存唐宋以  
還鴻規茂炳唐會要載君臣箴一篇是德

宗所以賜節度使也金石錄載八分書政  
刑箴一篇是德宗所以示百官也宋則端  
拱三年太宗作修身箴賜陳堯叟等祥符  
三年真宗作守官箴示輔臣王旦等明則  
宣宗御製官箴凡三十五篇分賜臣工莫  
不潤金石以為訓竝羲舒而宣耀昭鰲禁  
之寵光作龍圖之秘寶然未有

寶訓昭宣

天章倬漢如今日之盛者也

第四問

李芬

綿州直隸州羅江縣知縣 李桂林 閣薦

翰林院編修 孔傳綸 批 條理分明

翰林院編修 官煥 批 茹古涵今

夫刑以弼教也舜典欽哉欽哉惟刑之恤  
哉恤字今文作謚考詩假以溢我左傳襄  
公二十七年引云何以恤我廣韻引云誠  
以謚我謚恤同義據爾雅謚為靜之文則

用刑者欲靜而無擾乃爲能欽僞孔以憂  
訓恤者非也易噬嗑內外卦無獄象而三  
至五互爲坎虞仲翔云坎爲獄爲法九家  
易云坎爲桎梏爲律又孟長卿卦氣啣噬  
嗑次旣濟於時爲十月漢法十月始決四  
蓋取諸此又獄字從犬噬嗑互體有艮艮  
爲狗說傳云艮止也仲翔云艮爲慎爲順  
慎順以止其靜可知是易書互相發明者  
也孝經緯所引皆後人附會依託之詞雖

上古世淳民樸又豈能廢刑哉穆王作爲  
贖刑蔡氏謂其一切權宜之術然以處罪  
之疑者哀矜曲全故聖人有取焉春秋刑  
書刑鼎孔子譏之而魏文侯時李悝作法  
經六篇一盜法二賊法三四法四捕法五  
雜法六具法後世律令之書實始於此漢  
除秦苛法蕭何定律令於李悝所造六篇  
增事歷擅興廡戶合爲九篇叔孫通益爲  
十八篇然尙習秦舊至高后元年而三族

罪除矣孝文元年而相坐令除矣十三年而肉刑除矣當時庶幾有刑措之風焉武帝以後法網稍密東漢五代或寬或嚴隋文帝始令高頴等定新律又敕蘇威等更定之除重罪外定留准五百餘條凡十二卷曰名例衛禁職制戶昏廡庫擅興盜賊鬥訟詐僞雜律捕亡斷獄其法簡要踈而不失故後世多遵用之唐刑書有四令者尊卑貴賤之等數國家之制度也格者百官有司所常行之事也式者常守之法也凡邦國之政必從事此三者其有所違及人之爲惡而入罪戾者則斷以律律之爲書凡十二篇大約因隋制而增損焉宋初仍唐制神宗時更其目曰敕令格式而律恒存乎敕之外蓋律所不載一斷以敕也元刑書三易世祖時曰至元新格仁宗時曰風憲宏綱英宗時曰大元通制要其得在仁厚其失在緩弛明刑制篇目悉准於

唐條例則因時損益未嘗不慎然奉行之  
吏往往以意出入所謂有治人無治法者  
此歟方今庶獄清釐期乎丕變伏讀

御製慎刑論至詳至悉無隱不孚邇者

申命內外臣工除莠安良無致株累仰見

天子好生之德洽於民心則刑期無刑之治不

再見於今日哉

第五問

李芬

綿州直隸州羅江縣知縣

李桂林 閱 薦

翰林院

編修

孔傳綸 批 博雅淹貫

翰林院

編修

宮煥 批 條分縷析

蓋聞民以食爲天國以民爲本小正邠風  
爲後世言農務之祖後人師其意者如崔  
實四民月令韓諤四時纂要最爲近之管  
子呂覽所陳種植法必有所本蓋古者自  
有專書故諸子得引之今已佚不可見矣  
劉向七畧所載農家一類其書亦無一存

今所傳者要以齊民要術爲最古此書撰  
自後魏高平太守賈思勰凡九十二篇其  
自序稱起自耕農終於醢醢資生之業靡  
不畢書而今本乃終於五穀果蓏實因後  
人重刊輾轉訛異之故唐中和節所進農  
書已無傳本而唐志所載因相牛經而及  
相馬相鶴因蠶桑而及茶經因五穀而及  
園史因園史而又及竹譜荔枝譜橘譜之  
屬雖觸類旁通未免本末淆亂陳旉撰農  
書三卷見於宋藝文志其上卷泛言農事  
中卷論養牛下卷論養蠶大抵泛陳大要  
引經史以證明之虛論多而實論少殊不  
及齊民要術之典核也農桑輯要七卷前  
有至元十年翰林學士王磐序稱詔立大  
司農不治他事專以勸農課蠶爲務行之  
五六年功效大著農司諸公又慮夫播植  
之宜蠶績之節未得其術於是編求古今  
農家書刪其繁重握其功要纂成一書鏤

爲板本進呈將以頒布天下也後魯明善因農桑輯要中所言歲用雜事僅列爲卷末一篇未爲賅備因作農桑衣食撮要二卷分十二月令簡明易曉使種藝斂藏之節開卷了然信不爲無補也王伯善農書分農桑通訣六卷而穀譜四卷農器圖譜十二卷合爲二十二卷引据賅洽繪畫亦皆工緻可謂華實兼資者矣明徐光照撰農政全書六十卷首農本三卷次田制二卷次農事六卷次水利九卷次農器四卷次樹藝六卷次蠶桑四卷又蠶桑廣類二卷次種植四卷次牧養一卷次製造一卷次荒政十八卷末一卷爲野菜譜亦類附焉其書本末咸賅常變有備而又能條貫滙歸於一洵完備之書也外此若唐陸龜蒙之耒耜經宋樓璣之耕織圖詩明鮑山之野菜博錄亦各成一家言足備採擇者我

朝勸農敦俗邁越前古蜀西向稱膏腴之壤  
生斯土者食舊德服先疇將見東作西成  
以益臻豫大豐亨之美豈不懿歟

嘉慶二十一年丙子六月乙未 臣孔傳綸

恭奉

簡命副編修 臣宮煥 典試四川伏念 臣浙右庸

材由嘉慶十四年恭遇

皇上五旬萬壽特開

慶榜會試中式第一濫列詞垣榮幸逾格先是

癸酉歲承

命主試粵西茲復仰荷

溫綸持衡西蜀



恩寵有加惴惴焉隕越是懼尅期赴事矢慎矢  
公得正副榜士如額擇其文尤雅者恭呈  
乙覽臣例得綴言簡末竊惟

國家取士將以潤色鴻業黼黻經猷而籲俊  
賓興尤爲首選易曰修辭立誠書曰辭尙  
體要矜典貴而涉龐雜者無實踐之功也  
騫采藻而乏精義者非心得之學也真德  
秀曰文以明理故爲文者必先知明乎理之  
是非而後言有物而有序則固非折衷乎

聖賢之言不可此經義所由重也我

朝昌明經術四海同風

皇上典學緝熙觀文化成幾餘之暇猶復游心  
古訓勤勤然爲天下先一時淵鑑瞻聞之  
儒洪筆麗藻之士莫不岍然而興蔚然而  
聚矧蜀都古稱文獻豈獨無經明行修者  
以徵

盛世同文之治哉臣不揣謏陋謹與臣宮煥悉  
心閱覈雖不敢云拔十得五然卽文以觀

人其旨正者其人必端以慤其氣厚者其人必溫以栗其神清者其人必廉以敬其詞昌明博大者其人必磊落而英多而要皆根柢經訓以明乎理之是非而一歸於醇正其他塗澤佻巧之詞概弗敢錄庶幾佩實銜華通經足用冀克仰副

聖天子作人之至意者將於是乎在此則臣區區之忱所爲自矢者爾

文穎館纂修本衙門撰文翰林院編修加

二級臣孔傳綸謹序

總目録

三



